

崇雅堂詩鈔

崇雅堂詩目錄

卷一

古今體詩七十八首

戊申至戊午

卷二

古今體詩七十首

己未至辛酉

卷三

古今體詩一百八首

壬戌癸亥

卷四

古今體詩一百十四首

癸亥至丁卯

卷五

古今體詩八十六首

戊辰至乙亥

卷六

古今體詩一百四首

丙子至壬午

卷七

古今體詩一百三十一首

癸未至丁亥

卷八

古今體詩七十三首

丁亥至己丑

卷九

古今體詩一百二十首

庚寅至甲午

卷十

古今體詩一百四十四首

甲午至乙巳

崇雅堂詩鈔卷一

仁和 胡敬 以莊

早春天竺山中

一徑入松翠四山聞鳥哢不知此身高但訝羣峰低緣厓拾瑤草俯磴窺靈谿霜寒春意淺塔迴雲陰栖流觀心獨妙無擾物自齊林鐘催夕陽已在西山西

湖上遇雨

雲從山中出還作山下雨湖光垂澹澹巒氣互吞吐雙槳打中流回頭失孤嶼時作退鷁飛風號怒於虎須臾理歸楫斜日照巖戶風止雨亦收白雲無處所

庭梅始開風雨驟作感而賦此

花開憶昔趨庭時東風披拂迴春姿噤寒背暖開故遲待開不

開催以詩詩成一笑花滿枝把酒酌花千百卮暖煙晴日勞護
持花殘重譜傷花詞而今往事空嗟咨花前飲泣花應知玉容
慘澹含怨思風橫雨斜難力支來朝落粉盈階墀夜臥厭聽吹
參差

書懷

檮材端合臥林邱頌酒判花事事幽篝火夜深偕弟讀版輿春
暖奉親游凝塵一榻奴慵掃小榼三升婦代謀比似揚雄甘守
寂未須重賦畔牢愁_{堯切}

雲壚山房訪黃含山道士

何須遠城市卽此是山林白石煮池上紅霞嚼夜深鶴閒如避
客雲嬾本無心示我新詩卷冷然塵外音

寄懷查春山嶺南

負米憐游子頻年客粵東鴻飛千嶂外書斷一春中雲影江天
樹潮聲海嶠風旅懷如得句好爲寄郵筒

詞翰誰青眼功名誤黑頭無田耕負郭有筆賦登樓梅嶺花邊
騎珠江月下舟高堂慈母在莫爲荔支畱

牧牛歌

秧鍼刺水波瀾瀾牧事春郊煙雨裏短衣遮髀來墉坻哇哇驅
牛聲不已大牛前行角雙犄小牛後隨拳短尾陰虹絡頭軛斜
倚力盡鋤犁汗霑髀畦東西走不計里憊臥荒塍鞭不起牛兮
辛苦無我詈欲鞭不鞭主人意區區芻秣報已多主人責牛心
太苛

竹根蟾蜍

天台謠
桐岡製

枯根盤幽厓色帶土花綠不知幾何年斬斷崑崙竹剝蝕風雨

餘巧匠事追琢天然肖蟾蜍游戲同刻鵠計長止扶寸把視不
盈握瞠視如矜鳴拗怒還瞋腹吾觀爾雅篇厥名載煩瀆爲鼯
爲鼯鼯名異實同族表異徒千年殊形或三足豈解緣青冥爬
沙井底伏妄思竊靈藥偕兔月中宿此君亦何爲形肖乃爾酷
矯矯歲寒姿託生在空谷苟邀伶倫顧得奏雲韶曲不然比君
子如簞滿淇澳胡爲忽狀此用詫兒童目世無蔡中郎笛材誰
省錄譬彼溝中斷于理尚爲福倘能吐清輝照我夜深讀

視用和弟疾

困頓憐予季沈疴感積年體羸長廢讀心悸久妨眠醫欲逢人
訪糜還入夜煎提攜勞阿母伴爾在牀前

憩冷泉亭

林迴谿轉到禪扉秋草離離石徑微巖桂拂雲香乍散天風吹

石勢將飛山泉清是蓮花漏崖佛寒生木葉衣幽鳥不須驚客
至暫來相對已忘機

次韻汪醉白夜雨見懷之作

長風起天末萬里捲雲霾積雨霽郊甸晴煙生水涯鳥聲歡曙
色人意澹秋懷砌潤蘭芽茁泥深屐齒埋開軒招飲伴闕徑待
吟儕獵祭書連幄鯨吞酒瀉淮劇談鄰父共小步野人偕醉草
臨張旭新詞唱鐵厓絳帷疏半卷烏几淨新揩怒吠蛙喧鼓翾
飛燕擲釵素心誰共鑒壯志苦多乖樊圃生何拙陶琴調不諧
懋遷輸駟儉辭賦效優俳厭夢莊周蝶慵蕪侯瑾柴藥欄鋤白
芷蔬壠翦芳荻豈遂塵生甌還誇菜有鮭清貧適吾分栖息羨
君佳杜老曲江宅歐公畫舫齋室懸徐穉榻庭植孝寬槐秋水
環軒檻山雲護砌階琴書新檢點泉石舊安排好待秋潮長招

呼集筇屨

陪施澹珍外舅游舒氏園亭

意行訪名園委曲度深巷虛亭面寒碧層構極軒暢屏山疊石
成厓嶠屹相向萬箇青琅玕煙靄杳摩盪微於枝缺處一角見
遙嶂清陰落琴薦蒼翠滿衣桁行行盡深叢陡覺天宇曠修廊
忽中斷略約跨其上活水環城根百頃波滉漾芙蓉鏡漣漪剛
報一枝放登臨豁幽抱流覽愜素尚湫隘城市中似此見真剏
豫擬梅花開更作剏谿訪杖履隨春風蠻榼挈村釀

曉游城東過邵氏城隅草堂還憩報國院池上

佳辰未容拋勝地隨所選城隅破曉過苔滑步履蹇嘗新稼已
登耐冷橙未翦衰草日微熏孤花露猶渲黃筠敗籬插白版矮
扉欵繞屋嘉樹陰吹幔午風善出門日杲杲未覺秋晷短側從

青楓林闢入白鹿院山僧貌如鶴偃蹇松下飯听然顧我笑甘
露薦茗盃導登招提閣俯視一渠滿孤光漾城堞細溜穿竹筧
參差紅蓼映蕭屑綠蒲偃悠悠鐘響寂了了梵音辨池光學禪
定僧意同我嬾閒參大乘法猛覺四塵散暝色上空林淹留坐
忘返

齋中憶弟用和

三人嗟各瘦爾較瘦還多疾竟同茱萸篇長廢蓼莪十齡悲失
怙五稔抱沈疴生小尤聰穎何緣竟坎軻藥知前日誤醫望到
春瘵孤館霜華逼寒天鴈影過客中誰慰問枕上自悲哦憶汝
渾無寐歸看近若何

得查春山嶺南書卻寄

嶺南山水世所稀珍怪窟宅仙靈栖平生足跡縱未到水經地

志一一吾曾稽湖遵彭蠡汎舟楫山陟庾嶺勞輪蹏雲封寺高
鴈愁度湏陽峽險猿哀唳問君胡爲往此地田無負郭難扶犁
堂上有老母菽水不足充朝飢膝下有佳兒舊物絕少青氈貽
依人作計聊爾爾登高望遠長悽悽竭來裁書肯寄我讀之不
異親攀躋中云羅浮山是海嶠最奇處高峰四百三十屹立無
端倪風雨離合可望不可到瓊樓玉宇萬丈相鉤梯麻姑之裙
化作五色蝶龍蔥巨竹上與浮雲齊想君攀蘿捫葛到絕頂定
有仙人佛子拍手相招攜其餘花田珠浦風景各媚好浮邱越
秀亦足登陟扶青藜荔支瑤柱足以療飢渴寶藏况有珊瑚玳
瑁象貝通天犀從來物美猜忌集莫學薏苡貪載遭訶詆吾聞
唐之劉夢得韓昌黎先後宦此輕裝齊颶風鱷魚蕩心魄蠻花
狔鳥探山谿興酣放筆滴下磊落千珠璣至今幽厓絕壑往往

剩遺句暇時好爲撫拾寄我勤封題吁嗟乎儒生貧賤少快意
無奈傷人跼促眉長低報衙聲裏啖冷炙何似茅檐兀坐餐黃
齋山梅著花春酒熟壽觴稱獻妻鴈鵲峰頭一回首知君
此際心酸嘶關山遙遙四千里夢魂不到明湖西行當火急辦
歸計故園楊柳已是三生梯

仲冬九日姊壻查春山以奉懷先人詩見寄時先人棄養

三月矣展讀之下悲來填膺卽事抒懷詩以代哭

己酉年
作附存

北風天雨雪掩關坐長歎千里尺書來拭淚開緘看書中詩五
章字字摧心肝上言節豪飲下言勸加餐已成死別離猶用相
慰安魂夢不到君道路誠漫漫憶昔君去日高堂涕洟瀾謂此
衰病身恐復相見難君去未幾時撫序秋方闌悲風振巖壑橋
木驚摧殘痛絕孤露軀奉養力未殫年來禍頻仍有姊骨未寒

姊昔聞父疾思歸淚頻彈祈神願身代念之中心酸精靈苟有
知地下長承歡君亦痛蓼莪我矧復操孤鸞依人遠行邁風塵逐
征鞍抱茲卓犖才甯久羈羽翰努力及清時時至看鵬搏嗟余
拙生計迂疏誤儒冠莫慰慈母顏髮素眉峰攢龜勉撫諸兒何
日心少寬沈思目前事兀坐愁千般况當歲將改積雪明山巒
荒齋罷吟會孤館虛文壇日暮無人來負手循空欄哦君寄懷
詩珍重如琅玕流淚答君書書到淚未乾

冬日寄懷春山嶺南一百韻已酉歲君有奉懷先人詩兼

述粵中風土故詩中及之

辛亥年
作附存

楓葉吳江落梅花庾嶺妍伊人懷遠道故國逼寒天驛使春遙
寄維揚城舊連揚州地湘沅接西粵淮海控南邊牛女星躔合
羊城地脈偏越裳通職貢銅柱靖戈鋌女側邊烽靜臣佗舊俗

沿稚川畱牧地新息建屯田仙跡安期著皇風陸賈宣思君五
嶺外憶別九秋前回首春三度驚心路四千庭闈辭白髮幕府
倚紅蓮意氣題橋日才華入洛年傭書方應辟虛席早迎賢嚴
武開雄鎮王恭聘謫仙丰姿標濯濯書記妙翩翩才擅枚臯捷
文成庾信駢醴筵傾四座草檄製千篇黃木灣頭月沈香浦上
筵栖眞訪靈脩表潔飲食泉煙雨樓盤鬱羅浮嶺蜿蜒珠江蘭
櫂樣花縣玉鑣聯暇念同岑侶知多別緒牽歸心切鱸膾殊俗
寫蠻箋春雨榕陰暗秋空海嶺圓風炎號怒鰐谿瘴墮飛鳶山
魃藏巖壑鮫人雜市廛夷音語嘲晰蠻態舞便嬛賽鬼村巫集
探驪龍戶還蚌潛珠母窟潮送蜃人船舶主腰纏寶山猿臂控
弦賈胡羅水市津吏算緡錢濱海家饒利通都俗近儂當鑪誇
窈窕迎客鬪嬋娟釵軫雲鬟彈花簪翠鬢卷光明金跳脫綽約

錦行纏賭酒紅潮暈彈箏翠袖揎妬情眉鎖黛別恨淚曉鵲十
斛齊奴聘千金估客捐繁華九衢隘珍巧五都填嫩綠裁蕉繭
輕紅坼木棉彩蠶搜桂蠹瓊樹藝君遷貢納青蒲澗租收紫芋
阡奇葩素馨燦佳果荔支鮮海蛤登盤膩蚶蛇入饌鱸蠙山黏
十百沙箸結連蜷慧苡巾車載丹砂藥杵研此鄉洵可樂塵事
奈相煎旌甫番禺指裝仍滯暑褰渡江聞衛玠浮漢逐張騫虞
慶章貢重迴楫青徐更著鞭岱高峰嶺嶺河激水濺濺都會開
燕薊星辰拱澗漚文明仰閭闔靈秀攬山川鳳闕花迎日龍池
柳帶煙大觀驚止矣懷抱倍佳焉與世周旋久多君嗜好專新
吟富黃絹舊業守青瑣王謝家風著匡劉經訓傳軒邀韓愈過
楊訝管窠穿李薦才誰敵劉賁運偶遭過都常歷塊結網幾臨
淵但具飛騰氣終爭造化權荆山無玉棄燕市有金懸空北方

求骨圖南暫息肩履誠遵坦坦賁肯守茈茈價已雞林播名終
鴈塔鐫劒開歐冶鏐琴和伯牙絃轉眼徵侯霸羣心佩服虔自
多鍼芥契待養羽毛全羨子方巖舉繫余獨涕漣此生何不造
孤露劇堪憐仲米情空切莊椿歲不延心驚電夢事腸斷蓼莪
篇作賈疏心計安愚寄簡編家傳在詩禮手澤認丹鉛騷雅追
公幹經笥新慕孝先故交雲過眼慈母雪盈顛似鼠銜薑拙非
蟲食蓼便是非消鹿夢得失委魚筌阮席科頭坐陶窗跂腳眠
琴尊身計戀冰炭世情蠲晤對藥三尺栖遲屋數椽劉伶閒中
聖蘇晉小逃禪螢影輝書幌芸香拂硯磚荒庭蛙蚓吠淺沼鷺
鷺拳雅有消閒興會無入俗緣懷人遲鴈侶撫序感義躔澤國
兼旬雨秋風幾樹蟬空階下梧葉壞壁篆蝸涎殘暑新辭扇輕
寒早透縣雲龍思渺渺烏兔走竣竣憶昔同游處移時一悵然

暮潮看古渡巖桂探層巔野店沽芳醞春郊拾翠鈿聖湖煙霽
羃靈鷲草芊芊越女花攢鬢吳姬腳扣舡連塍秀禾黍幽澗足
蘭荃輒美平頭笏芳鮮縮頸鰠江南多樂事行矣好言旋

雨過

片雲將雨送斜暉庭樹陰陰綠四圍閒極不知春已晚捲簾燕
子引雛歸

新綠

香國重尋夢已空綠雲深淺護簾櫳最憐夕景翳翳入恰稱輕
煙澹澹籠送響乍驚飄幔雨成陰偏借落花風小窗面面涵虛
影人坐青綃步障中

漢剛卯歌

按漢書注剛卯長一寸廣五分四方當中夾穿孔以采絲貫其底如冠
纓鞋刊銘其上元始間王莽所造言赤德氣盡作此濟之後與金刀皆
廢不行其制或玉或金或
以桃木余家藏有玉者

形模非璽非圭璋黃俾蒸栗白截肪五紮黍廣十黍長采絲襪
襪貫中央圭角四周區陰陽蟲紋細篆鐫兩行祝融夔化文煌
煌四色青赤間白黃既正既直觚且方庶疫剛瘳莫我當銘言
詭譎費揣量往事欲說愁微茫火數三七天降殃太阿柄授外
戚王蠅聲紫色握乾綱欲學有虞禪陶唐桀驚政不由舊章憑
藉小數愚編氓威斗符命資悖狂金滕大誥擬元良遂遷炎祚
登明堂九府圖法紛更張龜寶貝貨制不常二十八品誰稽詳
云赤世盡黃德彰錢刀禁止窮工商爾時剛卯潛何鄉不與赤
仄同銷鋌曉曉附會羹沸湯卯金刀說何披猖上稽黃農逮成
康不聞識緯徵機祥歷數在德厚與涼小物豈足關興亡符傳
赤伏圖會昌嗟爾作俑令人傷君不見武庫一炬空寶藏莽頭
久作灰飛揚鬼神胡爲此周防竟使遠歷千風霜平生嗜古成

膏肓持其厭勝充奚囊何以佩之雜珩璜氛祲假爾靈爰禳

定鄉竹枝詞

定山山南江水橫定山山北田疇平天公作意兩方便山北長
雨山南晴

山櫻桃花紅滿頭乘潮日上烏雅舟儂心誓與定山定郎意終
似浮山浮

月夜懷項蓮峰

長風吹盡雲滿天明月忽墮幽階前鉤簾起坐納清影夜涼漏
迴愁無眠應門憶昔方童年草堂文酒時開筵觥籌交錯爵無
算醉視華月升林顛百年此樂謂得全何圖變滅隨飛煙空堂
無人夜蕭瑟祇有清影相周旋蓮峰先生腹便便家四壁立無
一錢青瑣終歲坐穿膝一室經史窮鑽研丈夫四十猶在功

名蹭蹬亦可憐泥塗軒冕各分定安事得失相憂煎明湖過雨
開白蓮散髮試弄清冷泉徑須痛飲效河朔歸來月下相與醉
舞衣褊褊

煙草

奇英產甌越名擅淡巴菰清受金天氣黃昭土德符木華涵厚
澤火色稟中區石馬當年種金絲徧野鋪採非遺下體然不避
洪鑪焦受焚如苦香從爨後蘇易憑炎上勢能免熱中虞糟粕
成灰燼芬芳散座隅破除羣濁盡呼吸此君需竿蔗從頭啖筍
荷信口呼鴈銜蘆自警魚咬沫相濡蜃結旋消長龍嘘乍有無
幻奇誇吐火濫好笑吹竽味寓酸鹹外人誰嗜好殊文章隨噴
薄意緒出縈紆屢引含機杼虛中轉轆轤妙真齊炙輠攜稱對
編蒲餘蘊供尋繹幽芳任委輸午眠勞久憶卯飲劇相須檻外

茶香度簾前篆影孤微津生齒頰沈醉徹肌膚積悶還從遣輕
寒好藉驅煙霞姿澹泊山澤氣清癯吐故會無惜含華自足娛
撈腸熏卷軸灌頂勝醍醐健亦支鳩杖癡同守兔株耽深彭澤
酒思甚季鷹鱸何處難忘最明鐙夜向徂

送汪醉白歸嚴州

歸櫂半帆耳行程百里遙斜陽富春郭秋雨廣陵潮稻杵長腰
美魚膾巨口饒何時同翦燭風景話深宵

寄懷醉白

平沙楚楚石棱棱歸趁西風羨季鷹一櫂寒煙秋水濶兩崖紅
樹曉霜凝厠身猿鳥情多暇供眼雲山興倍增料得懷人有新
句篷窗書徧剡谿藤

秋日城南感興作

郊原風景歲將闌衣襲輕絛不敵寒山帶夕陽秋意健徑穿黃
葉履聲乾儒冠似我憐雞肋身世從人笑鼠肝且向旂亭邀一
醉未須塵事苦憂歎

息游草堂詠冬青

閒園繁種植有木名冬青森然展蒼翠直上何亭亭喬柯摩雲
煙老幹排風霆秋空聲謾謾月夕光冥冥足當棟梁任肯受霜
雪零曷不其槐棘移植於帝廷上巢丹穴鳥下蔭堯階冀萬年
表嘉瑞連理通精靈按冬青卽萬年校木宋史五行志政和三年七月玉華殿萬年校木連理遭逢亦偶然且植
幽人庭輕花展晴昊細實垂疏櫺我來值深秋碧葉光瓏玲科
頭坐其下吹鬢風泠泠裴回戀清蔭魚鑰忘重扃報街鼓統如
仰視天橫星

書查春山嶺南紀游詩後

興公賦天台身未天台去瓊臺與朱闕一一以神遇三山五嶺
亘煙霧自是東南絕奇處平生足不出戶庭空向詩人集中睹
讀君紀游詩深我遠游慕洞庭連天彭蠡遙安得長風片帆渡
男兒弧矢懸初生要當萬里縱橫行閉門終歲作書蠹胸中五
嶽何由平君才跋浪滄溟鯨倒屣處處公侯迎東登泰山北燕
京萬里飲馬秦長城君庚辰歲自
燕京過此壯游磊落襟抱豁奇氣抒瀉江湖
傾邊城日落笳亂鳴悲歌慷慨多商聲掉頭去釣南海水紅蕉
花下千詩成嶺雲迢迢秋月明聞笛忽動關山情行裝檢點書
接軸三載歸來舊茅屋瑤編手把示故人戢戢多於筍一東海
風吹盡塞上沙齒頰香染花田花桺榔實青扶荔紫收作吟料
饒風華人生有才志自賒跌宕未肯懸征車昨來苦道不稱意
欲更嶺海探煙霞舊游重到倘得句願早寄我天之涯定知風

格更適古足繼嶺南三大家

春山歸自嶺南還赴淮安幕餞別二首

言歸願方遂復別情何遽孤帆送君還又送君南去朝辭海嶠
秋暮指淮陰路秋雨浙西潮紅葉江南樹歡會未經旬離感深
前度勿辭一尊酒聊慰三秋慕相思天一方明發君何處

浮雲無定蹤游子倦行色別久喜還家歸暫翻同客家人笑握
手細訴經年憶僕夫早駕車又作經年別弗言別太易猶勝歸
未得弗言秦淮遠猶勝蠻江隔故鄉忍輕去塵鞅苦難息莫更
遲遲歸倚廬雙鬢白

歲暮吟答項蓮峰

讀君歲暮吟使我腸斷絕君吟一何悲有子去秋歿我吟今更
悲有弟春前卒憶昔七年前夜侍老親側覩縷舊時事一一爲

敬說汝上有三兄長者歲三十倘能身俱存足代耶筋力命也
可奈何天不憖遺一先汝次第亡汝未見顏色及今復三人就
中汝稱伯耶幼多苦辛未老髮全白羸病臥經年難復冀延息
回頭指幼弟欲語久於邑以是菀諸孤未及見成立渠頗眉宇
清才料非汝敵親朋每見許謂是駒汗血汝好善視之凡事慎
撫卹場之敦五常場之親六籍庶幾成弟名是亦稱子職耶死
苟有知地下心亦悅長跪受遺言椎心簣竟易狂飈起天末白
日飛霹靂同作苦孤兒相對泣幽咽遺言猶在耳課弟敢辭責
聰穎弟性成自幼愛文術疑疑隨阿兄孤館永朝夕從兄受孝
經大義了能晰從兄受風詩上口無一失苟及易與書次第業
就畢二豎何不仁五載造沈疾試方恨庸醫謬誤投藥石相依
十五年一旦成永訣調護負爲兄卽死罪難釋棣棠駢枝生鴻

鴈飛接翼接翼警相呼駢枝庇華實物類且如此人生獨離拆
感此心悽然終歲閣吟筆今朝把君吟根觸淚霑臆記得去年
冬弟病方增劇藤牀晝擁衾畏對風凜冽殷勤執兄手難字尚
求識謂待轉陽和行理舊書冊此景如目前庭樹又積雪書冊
紛縱橫塵沅雜鼠跡棄置敝簾中酸心忍開閱君哀幸少減莫
蹈西河轍矧茲懷抱中已有呱呱泣我哀更無涯長抱西堂側
春草生池塘是弟彌留日欲知友愛情此身難再得

壽袁簡齋先生卽用八十自壽詩韻

大集排成號小倉編珠綴玉幾千章百年長受神仙福四海同
瞻夫子牆名譽偶然留翰苑鄉心難忘是錢塘因春來作鶯花
主可許彭宣拜後堂

養素林泉樂有餘金泥萬帙子雲居占來海內無雙譽讀徧人

間未見書濯柳風姿陪几杖散花眷屬侍庭除勞勞多少京華夢若箇名山肯結廬

歸奉潘輿鬢未星純鱸味好一官輕興酣搖筆千言就老去看山萬里行是處逢迎詩弟子等閒著作魯儒生風塵卅載渾游戲借與兒童說姓名

江左人思宰績長棠陰深處住何妨鄉關重過懷桑梓親舊相逢各老蒼已把源流傳後學肯搜遺佚到高陽殘編東野天畱在願乞韓公序一章

先人遺集蒙允以刊後作序人事繁瑣未及付梓而先生已歸道山感悔交并追識于此

修禊日項丈秋子招同何春渚余松屏萬近籊孫半峰奚鐵生諸丈集春及草堂看牡丹

穀雨過後上巳交二十四番春風饒華堂禊飲集褰屐恰值鼠姑新解苞入門繁朵驚照眼步障曲折圍輕綃中央一叢色深

紫玉樓旁映姿尤嬌半開爛漫半猶斂地以風日分肥瘠天然
富貴出佳麗翠鈿檀注珊瑚翹曉妝粉澤開素靨夜譙酒暈生
紅潮羣花豈無好顏色難此態度莊不佻文章孔翠亦驚衆未
若威鳳翔雲霄吾聞雒陽花品記九十餘種名爭高後來往往
品居上第一不賞魏與姚大江以南誰比數目未及見空魂銷
從來富貴忌鑒足得一染指堪稱豪今春况值久霖雨幾處狼
籍隨風飄眼中所見此爲最花似慶與詩人遭天公獨厚有深
意欲其彩筆爭搜雕施朱著粉聊爾爾語涉寒瘦防花嘲平生
愛花不解種到處借看還終朝風光如此忍孤負入夜更遣華
鐙燒絕勝窮愁杜陵叟三月三日江之臯麗人秦虢只許背面
窺風標

游餘庵偕吳聽山

疏畦千頃綠參差畦外茅庵面曲池春暖漲痕平暑灼日斜花
影上果愚僧嫌貧士逢迎嬾詩寫幽懷步履遲我倦欲歸君未
許籬門小立更移時

繆樂山來蝶圖

圖有記云近得羅浮繆蘭既蛻出籠置花間有異蝶飛來徘徊
不去同閉籠內數日俱稿主人感而瘞之并作圖以傳諸好事

畫蝶昔數滕王嬰大小海眼名區分江東撻木亦殊絕何似此
圖所繪尤超羣神光忽照眼墨藩何氤氲遽遽栩栩態各肖滿
身尚帶羅浮雲吾聞朱明洞遺下麻姑裙噴蜂擲米弄狡獪幻
出青紅碧綠高下飛紛紛友人今歲歸嶺表遺我一繭愛之不
啻金千斤清和四月交孟夏衿衣習習風吹熏棟花亂落梅雨
灑疏簾清簟無纖氛逡巡破繭忽騰出乍見使我生懽欣五雜
組三入纁光明錦刺繡紋咸池日浴赤城霞昕扇九華兮燦燦
衣五銖兮紛紛吐綬之雞倒挂鳳遜爾餐風吸露姿續紛惜哉

夏屋久閉置重重簾幙未許青鳥通殷勤天涯淪落悵不偶雙
栖恨不及早持贈君爲放山之巔水之濱一雙歸去凌蒼雲使
爾枉負陸離璀璨之奇文但令此圖此記能長存春花秋月弔
爾韓憑魂得一知己應銜恩君不見香鬢粉翅野蝶各自媚美
人團扇畱新痕吁嗟乎世眼悠悠何足論

玫瑰花

豔冶風前別有姿亂紅吹盡獨開遲濃熏麝炷香初破徧壓鰲
綃態不支簪向綠雲何旖旎生來紫玉最嬌癡懸知梳裏蘭閨
曉白向瑤階折一枝

送吳聽山歸如皋

名園水繪帶斜暉楊柳千枝竹四圍正是江南好風景藕花香
裏逐鷗歸

客愁無那念鄉關收拾新詩返故山
知否行程添長物載將三竺兩峰還

貓

萬貫呼名好吳鹽聘及時
假人秋冷後索飯午炊遲
素飽誠非願清貧諒共知
鼠多渾不捕翻愛爾心慈

燈花次韻

銀釭小剔燕紅霞金燼高然隔絳紗
雙穗忽驚開竝蒂一枝偏稱照如花
深閨兒女頻擡眼遠道音書恰到家
爲語雙鬟須愛惜等閒休掣繡幃斜

昆園八詠

雪浪山房

宦海破除煩惱家山歸養沖和想得懷
如冰雪閒看世上風波

秋聲閣

歐陽感生夜讀昌黎理悟蟲鳴窗間竹影梧影簾外風聲雨聲
平橋

灩澦魚鱗春漲彎環鴈齒紅橋比似濠間心樂不同潮上魂銷
曲洞

具體名山六六斜通仄徑三三偶學書臨池北更穿雲過花南
老松

謾謾風聲盈耳森森黛色參天共詔生來得地不知栽自何年
古桐

剛賦詩逢雨至正披襟值風來卽此自成天籟何須取作琴材
盤槐

如蓋童童葉翠到秋羃羃花黃我輩干卿何事年來爲爾添忙

雙桂

高潔肯爭春豔芳華畱照秋暉揀取一枝安穩笑佗招隱方歸
過朱朗齋夫子碧谿草堂

問字頻來載一尊子雲居處自深村竹籬裊裊斜通徑秋水溶
溶直到門北郭幽栖塵事少西冷諸老幾人存瓣香合下南豐
拜手把遺編仔細論師家藏有吳西林先生吹噓錄說文
韻藻及未刻詩稿是日出以見示

同人許氏祠探桂

蓼葉披風柳帶煙秋光閒攬郭東偏數弓園小水環戶一簣山
低花覆肩密蔭靜連苔徑裏繁香吹度石欄前藥鑪茶竈安排
易乞與閒窗鎖日眠

紹興石經

光堯榜閣自昔聞石經名與鴻都分大書深刻垂寶文重道想

見中興君是時國邑喧征鼙長驅入寇邊馬羣治兵如絲乃益
勞主和主戰徒憂懼龍沙萬里駐輓轡汴京回首悽榆枌中原
誓復志孔殷劣有餘暇窮夔寶金蓮燭燕憑東縕樂此不疲甯
倦勤金暉玉躑陳紛紜千番辟蠹流香芸側釐紙滑麋丸芬裒
鈔不憚十指數眞書酷摩王右軍雜以章草姿氤氲雲窗窈窕
絕點氛憲聖侍側衣練裙續書擲管何慙慙字體一例無猶薰
成均勒石策帝勳寫碑照耀泮水芹釋奠禮舉當大昕鐘撞無
射鼓奏賁傳觀奔走弟子員嘑警書出洛鼎出汾宰輔豈識宵
旰廩出入呵殿乘朱幘跋尾頗得顏魯筋心正筆正徒爾云百
年王氣滅裂耘偏安一餉同聚蠹故宮迷離竄驚麕光堯閣圯
餘斜曛雨滋日炙狼煙熏斯碑歎其玉石焚楊喇勒智來狺狺
築塔悍運成風斤呵護賴有廉訪勲緩頰片語能解紛中郎石

經嬈皇墳況乃睿藻垂天垠卽看廣殿凌蒼雲長廊徧覆饒清
霧徑須三日除羶葷摩抄淨剔苔蘚紋手搗萬本聲砢礪襲以
古錦嵌元纁俾令學士生歡欣自今永鎮湖之濱

石經在郡庫距西湖不里許地景

星弈弈輝祥雲

月下梅花用陸放翁韻

天涯萬里同明月獨照寒梅更奇絕清輝疏影兩徘徊仰視虛
明連一色素娥耐冷光炯炯騷客獨吟情脈脈平生自負鐵石
腸對景獨憐清瘦格美人睡覺腰肢情顧我嫣然顏一破繞花
不厭百匝行對月鎮思終夜坐劇憐花事容易盡忍使春光等
閒過倘教秀色眞可餐隔宿無春那愁餓

春雨

春光從此悵飄零仍否香車陌上停高閣飛花無客過小樓微

夜有人聽鵲頭添得半篙綠螺髻洗開千嶂青笑指湖山依舊
好不辭蓑笠幾回經

貞孝行紀外祖母張太孺人事

太孺人爲余外祖
沈瑛玉先生配

余前外王母處境何艱虞弱齡母見背幾載心含荼十三學裁
衣十五嫺詩書十七遣嫁去婉婉升青廬二十痛所天棄我身
先殂之死矢靡佗誓共歸黃壚依依懷內兒戀戀堂上姑姑年
桑榆逼出入須人扶有兒未離懷有女嗁呱呱心難兩決絕忍
死還須臾上奉夫高堂下鞠夫遺孤庭前烏柏樹來集雙畢逋
飛鳴朝復暮辛苦育衆雛衆雛羽翼成反哺供老烏烏老有雛
奉奚我姑獨無婦人縱無能奈何烏不如朝織十指裂暮織雙
眼枯但得姑心歡敢惜我力劬天時有寒燠人事多齟齬姑年
逼桑榆病入乘其虛纖素未成匹纖縑止丈餘將縑與素質不

足藥餌需醫我頭上釵典我身上襦典襦市藥餌需釵召醫巫
醫來復卻去言病不可圖母聞中心酸淚落如連珠兒生始離
懷女尚毀齒初育雛未得力姑死依誰居焚香籲所天願捨熒
熒軀吞聲攘左腕一割血濺裾創深豈不痛處之翻恬愉卽死
心尚甘矧此徑寸膚雖止徑寸膚入口患已除乃知血性誠功
與造化俱吾將告宰官破格旌其閭上爲頑懦式下作閭里模

梁太平元年五月丙午時鏡

鏡爲阮宗伯芸臺師所藏徑三寸九分鼻紐衆神入方枚內篆文銘曰口天下安口明多

子凡入字外篆文銘曰太平元年五月丙午時口口口道始興造作明竟百鍊正銅上應星宿下達口口凡三十一字字多反寫宗伯謂正是真字以避諱故改考梁敬帝小字法真六朝人忌諱甚密卽小字亦謹避之定爲梁器無疑辨著山左金石錄今按梁太平改元在紹泰十月當陳嗣先廢淵明復立敬帝之時是梁太平元年不得有五月也或者鏡非五月所造工人追用其月日歟

唐開元間水心鏡李太所進今銷磨元冥難求龍護失豈若此
歷千年過想當鎔造經百鍊傾市走看肩相摩紅榴然空日亭

午金精躍出如飛梭釵符桃印照妝飾美人一笑迴秋波從來
君國重人鑑軒轅仁壽空駢羅彼昏不知感梁代鏡亦埋沒隨
銅駝鬼神呵護免剝蝕畱與嗜古供吟哦雖微光彩質愈古未
要元錫加煩按塵封埃積土花繡閱世歎爾容成多背銘三十
有九字其七漫漶同曰窠紀年而下篆多反厥體非籀還非蝌
惟文反正則爲乏此豈取義符止戈太平紀年古來衆定以梁
器非唯阿法眞小字有明證據諱斷代明非佗似淵作泉丙作
景比緣爲祿犧爲莎于人所忽特舉示如此辯口眞懸河或疑
元改是年末此云五月理則那黃初元年無二月洛陽廢鼎遭
詆訶以斯考古亦近是持論奈欠明通何法眞在位僅二載備
藩齊室罹坎軻紀元乙亥及丙子紹泰太平名不廁太平元年
春正月大書史鑑辭非譌史臣編年忌複出如貞元後稱元和

其間永貞不錄恐垂久遠成蹉跎鏡當鑄自改元後追溯與
史同其科吾師鑒古審所出導江漢直窮岷嶓吉金貞石錄山
左撫拾豈肯遺羲娥流觀跋語識顛末古質不厭千摩抄賞奇
析疑意無盡蒲觴晚酌朱顏酡

宋宣和內府琥珀松虎筆筒

亦芸臺師所藏底有
宣和內府四數字

松脂漬地凝如石巧匠經營斲山骨舊膺秦室大夫封新授管
城湯沐邑松虎雕成態惻奇儼然五粒事游嬉金題玉躡編排
處兔穎麟毫位置宜舊物摩抄三歎息繁華想見宣和日中貴
希恩採訪勤纖兒銜命更番出已括圖書赴上都又搜珍異徧
三吳翠痕苔蝕銅魚洗虹彩花明玉鹿盧夔夔蠶鼎人爭獻雲
篆雷紋世稀見博古圖中考訂詳太清樓上排當徧更誰妙手
出新裁一握黃羅捧乍開博得神霄天子喜製從應奉局中來

神霄天子風流劇隨意丹青還翰墨點漆圖傳阿堵神瘦金書
仿驚鴻格揮雪廳前睿藻揮谿藤臺瓦共追陪圓邱歸草天真
記端禮親書黨籍碑天書寶籙紛相告京貫諸臣解阿好元妙
還加靈素銜九華新冊安妃號沈沈禁籙畫清閒祇有文房近
帝顏卻愛紅霞凝几上肯隨烏玉賜人間簪毫羨爾君王愛曾
否求賢同拾芥元祐遺謀盡棄捐邇英進講空颺拜籌邊無暇
到軍需玩好君王且自娛匣仿漢宮宜翡翠架安湘管定珊瑚
無何玉輦龍沙駐是物遷流避何處怪爲金創碎卻來險隨銀
絹輸將去寂寞牟駝岡上雲汴京回首冷榆枌竟看天水成南
渡好逐裘鐘歸右軍

爾雅釋荷備詳遺藹而鬢獨未及焉詩以補之賦蓮鬢

漫將巾幘比名花殺粉施朱未足誇別具孤高新品格可憐憔悴

悴舊生涯湘江秋老驚霜信幕府人歸閱歲華贏得髣髴饒娥媚採蓮何事惱吳娃

爾雅釋荷的中薏注中心苦則薏卽心之謂也賦蓮心

碧玉羅羅滿一簾箇中風味倩誰諳房於退後空排列心縱枯來尚倒含宿業多絲牽不斷再生成藕味回甘紅衣吹盡芳塘冷零落殘英意不堪

汪裕堂抱像圖

事死與生同古有尸有主尸於後世闕乃以繪像補憾聞僂見中笑語若親覩奈何儒生言言是戾於古纖毫苟不肖是謂佗人父泥古而非今斯語吾不取丁蘭祀刻木漢代風可祖先生城東居嘗被祝融侮手持遺像出佗物棄如土不見史立菴觀像淚如雨不見王三遷返風心獨苦繪圖示子孫垂遠其族譜

賀參元者柳觀賁渾者愈何如披此圖孝思生肺腑

送李林橋游徑山用蘇長公韻

五嶽以外非無山四瀆以外非無川山川豈必慕幽阻所貴足
跡時周旋徑山近在百里地脈自天目來淵淵天風吹山欲飛
去宮觀高壓山之巔山中老僧思供佛咒峰一一開青蓮試登
絕頂望山半如鳳翔舞龍蜿蜒此中王氣僧眼識坡老自昔曾
參禪君今雅意繼坡老雇山預辦青銅錢裁詩作別正秋九故
人慙愧林園眠摩霄遠奮羨鸞鶴得鼠相嚇羞烏鳶丈夫身世
在快意安忍塵事相勞煎青春無多白日速趁此腰腳猶輕便
送君無奈自厓返歸臥茅屋風騷然後游倘挈我爲伴青鞵布
韞期來年

由西谿汎舟至餘杭

遙遙秦亭山忽隱忽復現清谿莽回互孤櫂自流轉彎環徑百折隱約通一綫篷低帽檐壓篙激浪花濺曦光一以照魚影清可鑒容與更前進詰曲杳難辨村依小橋結隄繞修竹徧澄波漾寒碧遠岫蘊深蒨程纔計卅里景已闋千變清陰寄遙思到岸日已晏

餘杭雜詠

放櫂秦亭路縈回折向西有村皆種竹無地不通谿小市平橋集孤篷夕照低行程三十里到岸恰雞栖

小邑依山結清谿繞邑流居民多負郭入市總乘舟蒼靄連塍樹斜陽近水樓此鄉堪小隱蹤跡狎魚鷗

境與市廛隔人皆古處敦呼橋多帶姓聚族自成村賙恤通鄉里艱難示子孫還因耕鑿暇商畧到雞豚

一徑蕭森裏陰陰桑柘連豆棚臨水結瓜蔓過牆纏搏土家燒
鑿鳴梭戶織絲無輕此中士往往有遺賢

自足彈琴治時清戶可封訟庭多暇日胥吏半村農穀種貧先
貸魚租薄易供條然吏兼隱晨夕但哦松

卻上南門望周遭水四環因山標佛塔穿地闢城關谿女叉魚
去村農糶米還形骸都脫畧容我放疏頑

聞說南湖好汪汪千頃波蒹葭霜後老楊柳岸旁多空負清游
想無緣遣興過難招素心侶予意惜蹉跎

我有供餽粥南村田十雙秋山低覆屋浦水曲通江鱸膾供朝
饌松醪注瓦缸鄉居都不惡相較未能降

物產真堪美山肴野蔌全草深麋鹿長霜重橘橙鮮芋栗收園
稅魚蝦換酒錢就中風味俊紫筍滿林邊

卷之十一
三
況復歲云暮農間樂有餘藉牀先結草埽地徧攤蔬雞鶩朝營
食牛羊晚認廬尋行過村塾欲借苦無書

亦有叢祠建春秋社是司農桑告功畢簫鼓賽神時蜡祭流傳
古村巫意態癡無虛送迎曲好譜大田詩

小住纔旬日何堪喚權歸谿光含別緒山色戀晴暉後約期無
定幽栖願總違薄田容易買塵事苦難揮

崇雅堂詩鈔卷二

仁和 胡敬 以莊

歲朝圖

銅槃蠟滴無聲膩向曉雙垂花綺麗火撥松明灰漸多彩旭瞳
瞳射蘭砌清尊旨酒陳滿堂柏葉色翠椒花香萊衣次第起爲
壽賀歲車笑門前忙披看此圖境清絕兒女青紅嫌點筆卻將
數筆寫梅花屋角橫斜破香色花光鬢影朗照中但覺滿幅皆
春風添豪更爾弄狡獪兩頰酒帶屠蘇紅人生但得左顧孺人
右穉子跌宕生涯寄文史安問在朝還在市屈指團欒樂事多
三百六旬從此始

小隱蘧廬看牡丹

春光爛漫照眼明步障百尺圍傾城繁英壓檻香四散側耳一

片黃蜂聲嬌紅豔紫紛相向日暖風高各爭放一朵紅雲一絳
仙此身已在蓬瀛上就中一叢深白色澹埽蛾眉異標格主人
指點顧予言魏紫前年新換得幾人脫白身著緋此花轉以白
見奇乃知貴賤視多寡眞賞久已人間稀對花祇許笑開口貴
賤遭逢付之偶年來萬事等煙雲且醉花前一尊酒

寄遠曲

郎家住金陵妾家臨安里千里何迢迢相望一江水江水東南
流郎昨乘扁舟停舟過妾里登妾芙蓉樓窺妾青瑣間揖妾重
簾下照妾明鏡臺繫妾雙羅帕明鏡光團團羅帕同心環感郎
千金意密與郎往還香車油碧小處處嬉春好陌上去看花門
前來鬪草花如郎豔容草比郎游蹤妾心擬結實郎腳隨飄蓬
歸期郎不爽去打江邊槳送郎折柳枝正值春潮長從此各相

思三五明月時輪圓那得角藕斷空畱絲昨朝寄書來書意耶
嗔妾嗔妾忘寄書道妾不相憶抱甕汲江流江深無鯉游裁書
欲何託望遠心悠悠如嫌妾虛語郎試重來住再抱妾腰肢較
前瘦幾許燕東伯勞西張角相乖離何由生羽翼高下隨郎飛
南宋德壽宮子孫保之牙璽

朱文古篆蟠龍紐一朵紅雲驚入手流傳遠自建炎朝小字宮
名鐫德壽宮成憶昔太上居圖史萬軸宮中儲邊鸞鷓鴣海嶽
帖張萱竹石蘭亭書收藏一一鈐題徧不數楊娃紅沫豔舊府
宣和化作塵貽謀燕翼懷深念吁嗟太上名何尊況有孝宗爲
子光宗孫聚景園中侍玉輦奉華堂上開金尊吁嗟偏安抑何
恥乃是神宗之孫徽宗子靈武空傳卽位來建康競說遷都始
龍沙萬里先後殂欽宗無子徽亦無光理諸孫世相及南來開

基百五十游魂二帝可奈何渠自孝子賢孫多興圖縱較汴梁
蹙歷數已視錢鏐過卽看篆文寓深意誰道中原身自棄但占
湖山花柳天邪思蔥嶺冰霜地印泥猶帶舊時鮮好續宣和博
古編半壁江山子孫保令人長憶中興年

芭蕉

好與菩提一例看隱侯何事故輕彈本來舒卷心無著到此清
涼境最難秋色曉連苔徑淨雨聲宵送葛衣寒北窗遮我科頭
坐自在搖風度石欄

反遊仙

丹籙何年隸碧虛誦黃庭罷轉愁予牧羊兒亦飛昇去未必神
仙盡讀書

雲自無心水自流天台重到路悠悠劉郎縱說仙源重也要桃

花作塞修

懷吳聽山如臯

游龍河畔記君家夢裏尋君不憚賒九十二灣秋月色滿身涼
影臥蘆花

孫秀姑詩

勒貞珉建華表楔綽煌煌墓門道姑死近百年姑名人共曉烈
女流傳世不少難得如姑年最小 姑生貧窶真可嗟待年弱
小來壻家壻身遠逐父作客天之涯相依老姑度歲華隨姑閉
門搖紡車何曾解堆雙鬢雅天然自佳麗人人道女顏如花
閭虎欲逐逐往來里中熟闔女如花欺女身孤獨突入女屋持
女足女驚齧虎虎爪血淋漓虎逸女悲嘯心不甘虎辱 防虎
復見侵上告姑氏聞姑憤出走號於門東鄰西舍相過存聞言

晉虎生怒嗔各各髮上指願與虎理論 負荆強虎登門謝虎

迫人多氣爲下乾笑向姑前卑詞禮虛假姑憤擲以甌誤中其
曹面流赭虎乃大咆哮汝今恃鄰作城社好意存汝顏汝反虎
鬚惹里中豪族且無奈我何何況汝身寡汝豈能求人夜且求
誰者大聲呼女名不能致汝非夫也 女聞心慘傷慰姑旋入
房入房密密縫衣裳含酸仰鹵汁一死何蒼黃稍遲恐身爲虎
戕虎夜排闥入赫然見尸橫在牀流汗浹背走且僵姑驚起視
摧中腸平明呼冤來縣堂 排衙縣官出覽狀狐疑心不決何
物小女奴肝膽如此烈虎援吏胥暗關說縣官容情不與直道
女自輕身糊塗將案結沈沈海底冤天高向誰雪 天雖高恢
恢有網疎難逃桐棺三寸蓋不牢棺中香氣氤氳飄大吏知此
異廉實聞于朝命下虎首卽日梟香墳明聖湖頭標 嗚呼宋

武穆明忠肅與此墳成鼎三足南山之南北山北一般芳草墳
前綠志不可辱身可戮兒女英雄同一哭

秋桑奉和芸臺師韻

金風騷屑不勝寒一夕桑陰綠半殘樓起東南仍日照塞回西
北已河乾葉疎飛雉難藏羽枝勁栖鳥好避彈珍重功成衣被
後飄零休等散材看

大甯坊內影徘徊作表慚無李嶠才採罷羅敷春老去釀成陶
令晚歸來漫嫌價比勞薪賤容易光從若木迴八百株還今在
否攀條曾記武侯栽

麴塵微帶舊時黃無復相逢陌上郎已共枌榆成冷社若爲琴
瑟應清商田間畱蔭三苗秀牆下先回十畝涼莫向虞淵悲暮
景年來弧矢志方長

阿儼猶有日南枝霜露炎方到獨遲九月林間重結樾八蠶秋
後正縑絲縞繆牖戶懷陰雨憔悴姬姜感昔時比似挑桑風景
異好憑吳地補幽詩

蕭山余氏雙節詞

木棉開徧龕山下午夜青燈紡茅舍車輪轉轂腸盡摧石闕銜
碑淚頻瀉淚瀉如泉雙眼枯婦姑相對影單孤磨笄婦節同姑
峻扶杖姑年後婦姐姑年十九歸余氏勉力蘋蘩相夫子維摩
多病竟傷生長吉工吟成天死日慘雲愁幾斷魂誓從地下表
深盟已成嫠婦生何益爲鞠遺孤死轉輕勉強人間重視息雙
鬢青青到頭白教兒莫負阿耶心代壻償完爲子職機聲燈影
廿年心取次良家與委禽玉種藍田方得偶風吹琪樹不成林
鵲鵲行斷駕釵拆纔賦宜家成永訣痛壻殤來似舅年較姑添

得無兒慙割情強慰姑衰老一葉梧驚墜秋早關心伯氏子艱
難遺恨兒家女嬌小可憐偕作未亡人容易儂先了此身好向
黃泉重聚首那堪白髮倍傷神白髮愁多能久住黃泉相見姑
還去去作雙飛海上禽生成連理墳前樹冷雨酸風暮復朝一
雙唳血短長條憑將碧海青天恨寫入孤鸞寡鵲操

方切

風栗

鄉味收園栗風威盡下簾羞籩功最鉅論斗價何廉罽漸因秋
發篷難信手拈綠杼乾盡圻紫皺嫩猶黏通透儲筠籠參差列
畫檐潤含林雨重寒逼晚風銛外鏤邀霜信中枯避日炎蜜脾
新釀滿蟬翅細紋添齒縱乾能決心還老更甜精華從斂束圭
角愈森嚴藉有吹噓力終無棄擲嫌黃穰三百顆擘借手纖纖

旅舍述懷

曠野朔風起蕭條天宇寒
窮人臥茅屋竟夕不能安
重裘尚畏風母衣無乃單
羸癯我澀口母以何加餐
治生苦無謀勞母多憂端
桑榆景易逼念此摧心肝

我生已中年得子亦云喜
呱呱懷抱中長養從此始
賢否賦自天安能究厥理
但願災害無愚魯亦我比
關心飢與寒輾轉念難已
翻思我少日親念亦如此
所恨汝生遲大父不及視
感此中心酸淚落不能止
何堪呼我耶道未全爲子

題許青士石樓吟卷後卽用卷中和人對雪遣懷韻

平生交友形跡絕口出諛言
愁面熱一卷多君肯見貽
展讀寒宵燈似雪清辭麗句
駱驛逢如金在沙見飄瞥
吾儕於詩審何似譬彼爲山
尚邱垤摩天願假巨靈手一
剖鴻濛再團結陽開陰闔挾
造化隨意設施成突兀亦知
此願等愚公空費精神到

嘔血眼前休復論晉魏誰是歌行比虞揭今人才遜古人遠塵
事中年況牽掣我年三十百不成往事茫茫怕重說風流猶及
見諸老年少獎我文能綴卽今零落更無存愛而不見心如噎
學詩但守過庭訓豈敢誇肱已三折恥將輓語媚時好屢踏名
場苦傾跌春風轉眼又梅放且賦閒居安我拙宵來默坐數更
鼓布被眠愁冷於鐵挑燈幾度把詩看儕輩中推子英傑陳言
剽竊自誇詡知子鄙夷心不屑讀終棖觸少年事斫地悲歌肝
膽裂吾鄉風雅繼者誰我欲追從慙蹇劣

汪選樓寓園海棠盛開予過賞折一枝攜歸明日選樓來
云海棠經風雨落矣出惜花二律屬和成古風二十八韻
冷節逢禁煙微雨霽撥火嬉春憶明湖蠟屐游未果竭來過閒
園照眼春澹沱海棠一株繁壓檻開萬朵多君雅愛客導我花

底坐日高睡初起風約枝半鞦縈影落生衣一片晴霞裹側思
豪家游冠蓋鬪嵯峨清歌侑金尊雲髻垂髮鬢吾曹薄祿相煮
茗對亦可持贈還荷君分我紅一顆攜歸詫妻孥燈下一笑嗟
染指已諳味賞心安用夥昨來示我詩深道花坎壈東皇不解
惜一夜風堀堞曉起急開簾絳雪飄珂珂護惜無金鈴難免墜
樓禍矧茲白楊巷主已非何妥之子過花期將鼓金陵柁圖爲許
清士所
居是時有都中之行
而固亦將易主矣對花不忍別戀此嬌無那難期後來人解事亦如
我但恐到花開日閉歲隄鎖由來金屋藏孤負千嬰娜情長語
繾綣妙緒同炙輶平生慣作達持論與君左愛花不解種抱甕
情久情隨處但借觀自謂樂亦頗快意貴當前且泛明湖舸逢
花便勾留解衣槃礴羸比似海棠顛當鑑醉白墮

施愚堂先生八十自寫春風策杖圖

湖波十里明如鏡先生心跡湖波瑩桃花萬樹笑向風先生顏色桃花紅春風桃李花爭放先生嬉春策吟杖人在花光波影間鬢絲幾縷風搖颺看花隨處足嘯歌轉眼九十韶光多探幽選勝健腰腳花前未改朱顏醜將花作肴波作酒先生破顏客前壽不願綏桃鍾李供鍊顏但願日日春風長在手

許青士集同人餞春分得茅字

一尊同坐可憐宵櫻筍青紅坐上肴悵欲別來當此夕憶初迎入自東郊風光護遺金鈴繫花信催憑羯鼓敲纔助園梅舒麗萼更吹庭竹解新苞幾番辛苦蜂成蜜百轉陰晴燕定巢飛絮影看飄硯水亂蛙聲漸滿堂坳廉纖雨洗林間葉料峭風吹屋上茅香國路遙迷蛺蝶綺窗塵滿挂蠅蛸閨中竟夕籠鴛被陌上何人駐玉鞘一逕冷苔無屐點半林殘粉有鶯捎畱連西日

憑欄曲邀勒東風倩柳梢無可奈還拌薄倖最難忘比別深交
卽看芳序隨流水卻感浮蹤等繫匏得食儘輸謀似鶯盈懷頻
瀉淚如鮫百千可買甯容惜九十無多悔濫拋尋去定知譌鹿
夢續來何處覓鸞膠當筵共信畱難住明歲還愁會易淆且戀
餘輝燒短燭未妨深酌借佳庖韶年縱逝休牽恨來日偏長藉
解嘲安得謫仙傳彩筆賦陽春句擘箋鈔

憐春曲

并序

西泠憐春女姓嚴氏少失母父貧無行鬻女爲何氏婢氏孀居
憐之視如己女兄子櫛剔冠喪偶以許字之未嫁也會里中賽
社何氏族強飾女出女故明豔爲富家某所窺貨其父贖還因
購作妾女至富家悲號不食三日自經死其戚家爲余道其事
甚詳作此弔之

憐春春作亂花飛彩鳳羞隨雅共栖絕代紅顏委黃土傷心薄
命一青衣青衣家住臨安里生小何曾識羅綺失母堪憐十歲
餘憑耶賣向深閨裏深閨嫠婦眷雛年嬌女平陽一例憐絕勝
明珠擎掌上幾曾團扇泣花前相憐資作閨中伴銀鴨添香夜
來慣日高慵起捲簾遲小字琵琶鸚鵡喚鬪茗圍碁樂事多嬌
癡渾未解牽蘿櫻桃花底蕨蕤鎖楊柳風前懊惱歌風前戍削
腰如束十五盈盈還十六碧玉韶年正破瓜青琴有客彈孤鵲
孤鵲飛來阿母家母因含笑指如花擬將交甫懷中佩繫作雙
成臂上紗交甫丰姿原玉映曉妝舊識雙成靚聞把鮮卑續斷
絃願同溫嶠輸明鏡偕行女伴暗評量鷓鴣今朝化鳳凰同在
瑤池掌書記妒佗如願逐蕭郎相逢從此還相避肯使猜嫌惹
瓜李烏鵲雙星會有期波瀾古井翻空起惱煞笙歌動地來等

閒吹使繡幃開裝成七寶移春檻扶向三條走馬街銅街十里
遙相盼玳瑁裁簾花作幔玉樹風前嬌不勝金錢市上輸爭看
爭看游人忘却歸就中有箇暗涎垂可憐乳燕雛鶯態盡被狂
蜂浪蝶窺蜂蝶餘香爭戀戀重門歸去無由見濫從鴝鳥訴相
思求與春風作方便便來家下委文禽換羽移宮用意深十斛
願償金谷價百緡先買阿耶心阿耶縱博家蕭瑟欲鑄黃金苦
無術甘心嫁與甯馨兒入手貪他阿堵物不惜傾貲贖汝還還
將巧語賺雙鬟儘誇琪樹真連理諱說枯楊訂合歡巧偷不遂
思豪奪孤立欺佗女貞木得勢秋胡袖裏金無輝雍伯懷中玉
女聞耶計暗聲吞催促朝朝耶在門劫取竟同沙叱利訪來何
處墨崑崙情知欲住無由住卻願空闌非死處強飾妝辭舊主
前誓拌生向佗家去一死佗家去不難祇愁身去主孤單玉釵

銀釧都畱在，主好佗時當妾看。別有深情苦難剖，筓興扶上恩
恩走瞥見難禁。陸展狂一聲早聽河東吼，河東莫漫妒羅敷傳
語羅敷自有夫。分已樂昌成破鏡，料難合浦得還珠。防閑忍死
畱三日，覷便纖羅挂東壁。蛇醫驗取舊紗封，一點猩紅可憐色。
仍是青蓮不染身，拈花笑果悟前因。傳來倩女離魂信，拭盡何
郎傅粉痕。粉痕拭盡終何益，從此玉簫聲斷絕。決絕裁成薄倖
詞，來生願作雙飛翼。見說長眉昔未描，有人曾見早魂消。重來
杜牧傷春晚，一去秦樓竟夢遙。尊前聞語低徊久，幸未花枝落
君手。甘爲韓憑了一生，卽逢蕭史甯回首。西子湖頭桃李春，一
番風雨總成塵。不堪鳳坼釵分怨，多在花明雪豔人。

讀史

憔悴歸來自足羞，蛇行何事轉相求。男兒卿相尋常事，紅粉曾

封小國侯

許念茲西亭小築圖

吳儂打槳何處家在苕谿霅谿流水三义路曲垂楊一帶雅栖
門繞春波濫激橋隨沙岸彎環風林細雨吹散谿月扁舟載還
歸興蓴鱸浩蕩聯盟鷗鷺清閒紅蓼白蘋天際綠波青嶂人間
捲簾山影林影欹枕風聲水聲添著茅庵一箇著書足我平生

送趙殿撰

文蔚

李舍人

堯

冊封琉球詩

并序

謹案琉球國自歡斯啓宇在南朝煩海帥之師至察度輪忱遂
東土效波臣之職今

上御極之五載世子某恪循往例修表請封

上乃簡厥廷僚寵之章服時則翰林修撰官文楷內閣中書官

鼎元同膺是選承

命而行甚盛典也虎符龍節雙乘貫月之槎海若天吳共衛銜
書之使劃銀潢而徑渡望斗占程奉玉冊以遄征分更記里青
山一髮微茫認那霸之村黃帕千官導引作兜儗之語香爇迎
恩亭畔霞蔚雲烝

詔宣廣福門中嵩呼嶽抃龍泉瀉地濃添化雨之波鐵樹撐霄
高挹卿雲之露雖離乎恩澤沛典禮昭國體用彰皇華無忝可
預爲使臣頌焉若乃禮成餘暇俗省遐方採馬耕女市之殊風
輟軒錄輯紀待月迎潮之逸事囉噴歌新蕉扇擎來蠻女乞清
平之句苔箋捧出夷官誇松雪之書從此月橘風蘭都供吟料
紅魚烏鳳盡入行裝于以浮誇訂陳謝之譌沿革補徐汪之缺
抑亦大雅之所素裕也方今

皇威遠播文教覃敷宮戟棘以爲垣已非曩昔無儲經而壓架
漸啓文明太乙然藜侍子貢四門之學上丁釋菜素王尊萬世
之師蕞爾彈丸喁然向化將使臣之所以歌頌功德奉宣教條
被以華風革其餘習者其在斯行乎茲當雲路辭燕星輶蒞浙
明湖餞別大開賞宴之筵吉甫贈行願效清風之頌一篇序綴
五字詩成

柔遠敷

皇澤非賢任莫當無慙四方使

特簡二臣良捧

詔辭金闕浮槎達海疆
噓春回辨嶽挹露灑扶桑
鸞掖馳名舊
雞林流譽長
蓬萊風引便天際望歸航

寄弟立仁

兩苦行難暑亦難勞勞況復逐征鞍愧予筆硯生涯拙憐汝衣
裳遠道單須念門閭深倚望好修書札報平安歸來準擬熏風
候繞郭荷花試共看

秋懷次韻

瞥眼年光箭離弓江鄉寒早已藏虹霜嚴遠嶂彫濃翠風緊高
林響墜紅秋色有如將去客人生真是可憐蟲蘭芳菊秀須與
事一曲烏嘯唱未終

誰賦關山萬里秋興來滌筆向冰甌霜花開滿陶潛徑夜月明
懸庾亮樓白鴈風前今昔感紅牆天上別離愁何年採取支機
石奉使槎隨博望侯

消盡元龍意氣豪舊山歸臥石樓高邱遲入夢空懷錦王覽傳
家少佩刀酒畔怕聽歌婉轉鏡中愁見鬢蕭騷西風范叔寒依

井研集卷二
十一
舊借問何人解贈袍

一夜新霜逼舊衾迢迢長漏感秋深衝寒影斷遙天鴈帶月聲
敲別苑砧失學無成傷往事強顏從俗豈初心祇餘結習消難
盡詩句荒階負手尋

髫年三五悔輕過東下難回電逝波入世敢嫌知己少論才終
讓古人多無成效日悲填海有大方家笑灌河眼底紛紛誰傑
出所思其奈路遙何

晨星碩果悵寥寥追憶歡場儼隔宵新舊雨停空谷屐短長書
寄曲江潮何人著擬三都賦有客名題萬里橋袞袞諸公多不
賤年來我已壯懷消

一籬看老故園花長路茫茫望轉賒竿木逢場嘲傀儡雲霄飛
跡羨蝦蟇已同巢燕甘稱客不爲秋鱸苦戀家名刺懷中磨滅

盡韓門容否寄劉义

芒角空腸得酒生縱橫持論四筵驚大丹有訣仙營利內典成
書佛好名自古人倫誰定鑒祇今才士半虛聲登臨獨灑悲秋
淚我是疎狂阮步兵

再次前韻

擬拓城南地數弓小橋臨水跨長虹一谿霜點蒹葭白萬頃風
翻稻稈紅無定意還窺野馬不平鳴有效秋蟲流光彈指真須
惜楓冷吳江歲又終

平居况味最宜秋商畧生涯付酒甌落帽風吹簪菊座穿鍼月
映曝衣樓但饒吟詠陶潛趣不解登臨宋玉愁破葛一巾君莫
笑頭銜新署醉鄉侯

螺贏螟蛉各自豪先生一笑碧天高材非有用應供爨技不能

神且善刀種桂滿庭充小隱
紉蘭成佩學離騷禦寒莫訝全無
策畱得春前敝緼袍

空箱重整舊寒衾門掩蒿萊一徑深
秋色有情都付菊家居無
感到聞砧燕愁未決辭巢計雲嬾長含臥谷心
檢點叢殘千卷
在黃昏燈火幾回尋

一任高軒客嬾過通辭深愧託微波
朋交似水何妨澹書聚如
金不厭多剩有吟篇懷舊雨絕無才調賦明河
輸佗橘柚垂華
實蒲柳材疎奈我何

樂事頻年未寂寥登山臨水晝連宵
短筇絕巘朝看日孤枕危
樓夜聽潮冒雨客來開竹徑談禪僧送過谿橋
卽看檻外秋如
許忍把游懷枯坐消

高齋坐對黯無花巷曲過從幸未賒
篆影小窗熏艾蒨漏聲遙

夜數蝦蟇已償又積惟詩債欲去仍畱是酒家莫笑傭書生計拙百錢猶富買耘父

搖落何須百感生此心鷗鳥澹忘驚受恩最怕酬無力入俗何妨嬾得名已分榮枯關骨相好憑絃誦繼家聲迂疎獨抱年來願願早防秋盡撤兵

南宋畫苑待詔劉松年畫郭汾陽家慶圖

青巖西奔安史亂朔方孤軍起鏖戰當時唐若無令公先宋山河亡一半貌公不待淳熙年凌煙閣早圖形先同朝光弼亦英毅富貴壽考惟公全戰功班班垂史牘餘事陶情寄絲竹太息偷安南渡臣無公之材有公福君不見帝具軍容灞上迎前驅負弩皆公卿望春樓上勅親譙風度千載長如生又不見涇陽傳說公猶在回紇營中持滿待入門免胄一軍驚顰面諸酋盡

羅拜推誠意氣誰如公曷不圖入丹青中卻拈金粉寫娛樂未免意見猶凡庸我知畫工有深意眼見廷臣事和議中興名將剩韓王風雪騎驢湖上地展卷還增邊塞愁卽今羣盜滿山陬諸公有志窮人欲且請先憂天下憂

王深甫索題徐西澗朱閑泉合寫水仙冊子

作詩求似非詩人善畫寫意不寫形誰歟涉筆各成趣貌此絕代雙娉婷一圖沒骨徐熙筆渲染春風可憐色比似詩家體物工礬弟梅兄擬標格一圖瘦石摹倪迂蕭澹數筆清而腴儼如賦雪作禁體滌筆不許纖塵汗一寫其形一寫意意到能傳形自易好向司空品內參羌無故實饒深味此中雅俗誰定評跋尾已復詩縱橫虛堂無事日把玩想見骨與神俱清我從堯章識王子羽姿一雙瞳神秋水似風姿朗朗行玉山神仙中人有如

此此日披圖詩思賒敢裁綺語向君誇因君論畫偶得句花卽是詩詩是花

齋中讀書偶成

平生百無嗜所嗜惟多聞終日手一編不憚披閱勤甫獲旋復遺過眼如煙雲自非淮陰侯安能將多軍行當盡置之視若秦灰焚悟彼蒙莊言用志貴不分

樹蕙必九畹採蘭必三湘懷抱豈不偉垂老願未償不如闢閒園少植蘭蕙芳一枝亦春風一瓣亦國香

耶谿百鍊銅接撻以元錫耿耿含精光窺視下太乙出入懷袖間霜刃止盈尺攜建邊城勳已足萬夫敵寄言有心人莫鑄六州鐵

落葉

秋來愁絕庾蘭成搖落江潭百感生煮酒自憐情冷淡校書誰
擅眼分明乍添新月窗間影漸緊長風野外聲依舊青蒼是松
竹敝廬畱訂歲寒盟

項丈秋子招同人集蘇公祠賞菊奉和秦小峴觀察韻

高樓面面納湖光來接蘇門一瓣香吟筆到秋裁句健砌花和
酒照筵黃霜華入手驚寒信風味持螯泥醉鄉我欲蕉杯向公
乞酌泉同醉水仙王

酒家題壁

新紅如醉亭邊樹人記相逢舊游處轉眼寒楓又著霜衝寒重
過亭邊路掩抑含愁似昔年相逢依舊小亭邊青衫我亦同憔悴
爲爾臨風一惘然

仲冬病熱耳患失聰葉肅庵詩來適與同患戲簡長歌

炎上陰火熾褻然兩耳充形徒具坎坎有如以物填其中是中空洞果何物雖有鍼砭藥石和緩無由攻東鄰伐鼓西擊鐘靜聽不啻如蟻蠓十指苦遲鈍安得麻姑纖爪爬玲瓏旁人笑侮我未老先龍鍾答言卿輩何愚蒙我超上乘聲聞空不謂子復爾母亦參禪功新詩寫送似百怪駭我胸絕勝陳琳草檄醫頭風側耳聽牀下已覺螳鬪牛相同從今雨治聾更不煩社公元關祕鑰得子開重重翻思古人語不聾不可爲家翁報叔殺牛兒掇蜂卽欲不聽知無從不如返我聽默默全其躬審音雖乏曠也聰責以司燿猶能供疾雷破柱倚讀心從容縱使竊鐘市上手掩還無庸何必魚化龍逢人自謂吾聾蟲

蜀鵑行爲蜀女周蘭卿作

并序

蘭卿名絳虹蜀江州人父周文銘官粵西龍城淄中令女隨宦

粵西周卒於官女時纔十齡墮奸僕計流落平康里中楚人王
子山憐之贖以歸訂爲簪室父聞大怒作書以絕其子王抑鬱
不自得病瘵死蘭卿擬扶櫬歸葬先作書以告其父置不報羈
栖異土孑然無歸遂抱沈疴齋恨而歿年止十有六旅葬桂城
西鄙女明慧多才嘗作詞有人爲情生當爲情死之語嗚呼蘭
卿眞以情死矣吾聞粵西多佳麗昔石季倫以珠十斛聘梁氏
女至今梧州有綠珠浦在焉以蘭卿較之其視墮樓之薄命何
如也馮子放山自粵歸爲述其事并邀作歌

峩峩白帝城上有嘯鵠聲鵠嘯直過湘江濱欲歸不得攀枝躑
躑而哀鳴有客聞之雙涕零客且休涕零聽我歌蘭卿 蘭卿
可憐女生小閨中處耶也綰銅章堂堂作民主隨耶身榮心獨
苦長日看花淚如雨未到傷春年已解傷春作情語人慕蘭卿

才十萬爭聘取耶也憐之不輕許 血淚斑斑紅痛哭耶命終
出門不辨程西東安得明馳足送兒轉臨邛下無昆季上無媼
與翁茫茫遠道去安適從零丁相倚惟家僮 僮心蛇虺毒主
死謀暗蓄欺女弱無能豔女顏如玉賣女與平康詭言返巴蜀
得錢去向青樓宿吁嗟乎在山水清出山濁女小雖待年難免
汙泥辱 天壤王郎聞之心傷贖女豪解千金裘不重女顏色
重女不學邯鄲倡雖居平康里恥作倚門妝女歸感郎意氣長
低徊向郎說何日同還鄉名爲君婦未識君高堂勸郎作書報
姑嫜 郎裁書寄父郎父得書心大怒此子大不良乃取倡家
婦切適生不願見兒死不願兒歸拜墓 父書來郎心哀去畱不
決心徘徊蘭卿前致詞伏乞郎自裁莫以妾故傷君親懷郎言
與汝忍令中道乖拌身爲汝死誓不作伯勞飛燕東西開郎心

日戚戚病骨羸如柴一朝棄妾歸泉臺悲哉已矣郎今死矣
蓬隨飄風女蘿復何倚擬將身殉郎與郎了無俾誰撫郎棺回
故里但得見姑嫜敢行子婦禮沒身甘作奴與婢制淚裁書
乞郎父收妾瑩瑩軀噫嘻郎父真迂儒怒兒薄倖不許兒魂魄
歸鄉閭忍心兩決絕不報蘭卿書蘭卿日盼望目斷灘江上
不見寄書還但見灘江風起滔滔浪妾身縱賤微難代郎奉養
如何不念客死兒一坏歸與招魂葬仰面唬向天飛鴻爲惆悵
鴻飛滿江湄江離江芷經霜摧草枯卻復茂身似游絲飛絮
一墮終無回回思父生我生我羞門楣回思郎贖我贖我使郎
骨肉成乖睽傷心妾薄命敢怨君庭闈人生到此那用食生爲
生不得識君高堂死得同君歸

長至日西谿獨泛

谿光漾寒碧曉霧開冥濛中流坐孤艇四顧無人逢沿洄去復
去柔櫓鳴飢鴻旭日透波底魚影穿瓊瓏水花風蕩漾反景明
烏篷橋回境逾邃刺入菰蒲叢野鳥忽驚起飛過秦亭東仰瞻
天宇曠卿雲藹浮空懸知登臺望已驗來歲豐書生薄祿相歲
入無千鍾但期村釀熟足我瓶罍供昇平易爲樂我意安耕農
安能逐什一得失煎心胸微陽逗消息春在枯林中從茲數香
信第一梅花風徑須拖蠟屐繼此清游蹤鐘聲速歸櫂短晷何
恩恩推篷一延佇日挂前谿松

宋思陵賜岳鄂王奪情手札

古今通禮三年喪咨卿幹蠱毋守常以忠盡孝正今日墨纓權
起從戎行紹興六年帝書賜署某月日詞周詳是時朝號小元
祐同參樞密趙與張分屯諸將約畧數盱眙惟俊虔爲綱其佗

廬州及楚泗效力更有韓劉楊京湖起王作宣撫上游倚重同
金湯遣兵旋見敗劉豫唾手且飲黃龍觴奈何降詔未改歲已
召檜入中書堂兵機乘勝可進取屢請不報王封章酈瓊之敗
帝膽裂聽歸持服廬山旁嗚呼帝云帥師臣奉詔奉詔練卒屯
襄陽帝云班師臣奉詔奉詔振旅還潁昌廟謨前後自翻覆臣
於帝札遵無忘今看獎勵札中語帝非不鑒王忠良要知恢復
中帝忌幹蠱語不由衷腸當年聊應魏公請豈真有意窺汴梁
不然盡力斥浮議百檜何足關興亡忍將鄭重奪情筆更草詔
撤諸邊防敗盟莫咎敵多詐朝廷爽約先君王畱傳此札亦安
貴徒以王故爭收藏雙鈞已復勒貞石矧此遺墨蛟龍翔傳觀
我惜未一見見亦祇令心增傷鄂王祠前冬日冷琤琤響揚聞
空廊

龍井茶

過谿亭外正斜曛
未雨筠籠採已勤
活火鑪鳴雙井水
乳花甌泛兩山雲
清虛禪味參三昧
秀潤湖光占十分
香色由來誇第一
武夷陽羨總紛紛

暮春湖上寓樓

紛紛蒼雪上書幃
春事天涯付落暉
草色西泠新墓道
鐘聲南宋舊宮闈
花飄屋角紅千點
水浸城根綠四圍
好在晚風樓上望
似雅銜尾酒船歸
看山面面啓疎櫺
楊柳風微畫不扃
霽色斜開盤馬路
漲痕高過浴鷗汀
日涵湖氣浮窗白
雲擁嵐光入幔青
最是月明三五夜
清輝如水照橫經

空水澄鮮絕點埃
林煙生處失樓臺
春隨風捲浮花去
雲挾山

飛驟雨來蘇長公詩閒際領李將軍畫望中開陰晴朝暮看都好欲寫會無絕俗才

自漱石山房移寓昭慶藏經閣

傑閣馮陵切紫霄梵王宮後倚城濠同龕佛笑相逢熟遷木鶯猜作計勞小別湖光村路近全遮山色苑牆高落梅風起游情減新漲門前水一篙

嫩晴天亦費商量小雨停吹又夕陽風送梵音來別院竹飛涼翠滿虛堂山僧笑客逢迎嬾林鳥疑人去住忙我似聞鷗無管束澹然心跡兩相忘

鄂不館校經圖爲天台二洪題

不到康成學不止大洪研經有如此何意桃花流水間仙鄉中生古儒士小洪學徹天文家推步不使毫釐差胡麻生時不歸

去隨兄寄跡明湖涯湖山蒼蒼湖水綠鎮日游人看不足一燈
如雪照春寒風雨聯牀把書讀瑯嬛主人今大儒崇祀許鄭招
生徒得君兄弟置高舍如曜合璧星連珠訪君憶昔浮輕舸幾
度談經高館坐壁間指示鄂不圖博我新詩一笑嗟荏苒流光
近一年山櫻桃破熟梅天山櫻桃
紅常棣看花忽漫思予季遠道依人赴
北燕弟兄貧賤都相愛似爾通經真不逮丁晦早輯一家言君
不見曲臺經傳大小戴

方湛厓春隄試馬圖

垂楊匝地春如織紫燕黃鶯飛帖帖裙腰綠盡湖上隄一點星
流草頭疾鬣痕鞭影花光中側耳四蹏如有風舉頭西望忽大
笑正值京華吹軟紅快意人生有如此翩翩貌出佳公子我願
相從薄笨車千里之行共君始駉山迢遶漫思家如此明湖儘

足誇勝佐席帽黃埃客貪看長安一日花

劉宗伯信芳師命題天台桃源圖奉和阮中丞芸臺師韻
尺幅描將勝境還分明畫裏見神山紅迷洞口桃爭放綠滿谿
頭草不刪幽壑尚疑鳴玉佩高峰依舊擁煙鬟暫游仙宇塵緣
隔難禁巖扉鎖日關再到那堪訛鹿夢輕離應悔賦刀環水畱
惆悵空牽恨葉剩蕪菁好駐顏幾點落花春寂寞數聲嘯鳥徑
清閒披圖笑指前身是曾住瓊樓縹緲間

桃李新陰圖信芳師命題

披拂東風萬樹栽江南春逐使車來一林煙散青藜暖四照花
依絳帳開小試爲霖化工手早儲華國出羣材陽和長抱無私
意肯遣孤芳委草萊

題張晴厓粵游吟草兼呈吳兼山

張侯英英年二十壯游踏徧東西粵萬里從軍博一階歸作冷
官自怡悅示我粵游吟粵東吟草聲和平蠻花狔鳥讀徧半
空吹下悲笳聲悲笳聲起何處此時征苗粵西去白骸赤血青
鬼燐寫作驚人錦囊句初如奏宮商鸞鳳鳴鏘鏘砉然變激羽
劒戟森垂芒我讀君詩歎觀止不謂奇才更有兼山子兼山較
君尤少年兼山似君工詩篇千詩琅琅向我誦側耳金戈鐵馬
一片聲迴旋荆軻擊筑易水邊亞父撞斗鴻門前篇長欲絕猶
未絕窮巷嫠孤夜深泣一篇纔終一篇起前軍後軍相角犄殺
聲落日迴蒼穹戰鼓鼙鼙催未已問君胡以然云從上將銘燕
然燕然未銘將星墜祇餘身在含辛酸時於酒酣後誦詩不離
口但訴平生閱歷艱不知詩句佳還否聽君詩狂欲誦向張侯
知棄繻乘輅見公等如我輩者眞書癡卽今王師轉戰急二公

莫浪拈吟筆會須同草相如檄百萬軍前奏凱捷

兩浙輜軒錄題詞

天教浙水啓龍門文士泉臺盡感恩一代登樓操選柄千秋覆

甌慰吟魂家無專集名難假才偶同時例不存條例凡詩無專集及生存者不入選甲乙

編排微意在續修畱待後賢論

國風從此補三吳尚有幾娥未撫無一品集繁存爵里條例凡名公鉅卿集足單

行者祇選有闕出處數詩以存梗概四靈家小輯江湖藝林採備佗年志詩派分添此

日圖感極構材荷培養更蒙招拾到潛夫先人古儼堂詩集彙採入錄中

劉松年南宋中興四將圖

我聞十八學士瀛州圖其一乃是高陽繆公奸佞徒今觀此幅亦類是韓岳乃與張劉俱沂王戰勲稱最早光世於中名獨小漢家二十八功臣未必諸臣皆表表二臣但使無參商力助韓

岳成金湯卽今圖畫見顏色豈忍作意分低昂底事猜嫌無雅量轉宜低頭媚權相畢竟千秋定論何不然同貌凌煙上清波居士絕俗人圖傳褒鄂能通神惜哉取舍昧特識遂令義氣慙安民是是非非後來辨徒勞下筆開生面圖中之人除卻劉侯我曾見頑鐵墳前鑄更新塞驢湖上游都徧三將無成得首邱莫須冤獄痛奸謀尋碑來過栖霞嶺請看將軍在上頭

燬寇兵重鑄岳祠鐵佞人歌

無辜鐵以鑄佞人鐵不屑不屑爲佞人乃屑爲寇兵旣爲寇兵謂鐵無辜鐵亦難自明寇兵不可執佞人罪難釋燬彼鑄此計良得寇兵遇物無不殘以鑄佞人心與肝寇兵腥臊血淋漓以鑄佞人手與足千鋒萬鏃投一鑪鑄成鋒鏃之跡猶模糊隱示寸磔割死後身體無完膚吁嗟乎斯馬有劍何足汗竊鉤竊

國同其誅從今莫爲頑鐵哀無辜

冬柳

并引

仲冬之望偕趙雪門小飲湖濱有衰柳數株披拂鑪畔雖葉未
全脫而朔風蕭屑憔悴可憐賦秋柳者多矣冬蓋未有也興懷
搖落感賦斯篇

丹楓林外影蕭蕭折盡長條更短條孤艇斜陽隋苑水寒驢微
雪灞陵橋卽看生意婆娑盡已共飛蓬歷亂飄搖落江南愁庾
信賦成枯樹幾魂消